

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 42 (1928)

**Artikel:** Raschladüras : nouvas rimas e chanzuns

**Autor:** Bardola, Cristoffel

**DOI:** <https://doi.org/10.5169/seals-199143>

### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 11.08.2025

**ETH-Bibliothek Zürich, E-Periodica, <https://www.e-periodica.ch>**



# → RASCHLADŪRAS ←

## Nouvas rímas e chanzuns

da Cristoffel Bardola.

---

### 1. Raschladüras.

Dasper la run' il tragliun ais chargià,  
il fain cul prassuoir e la tretscha lià.  
Il paur cul rastè tir' intuorn dapertuot  
e metta ils vanzs in ün pitschen fagot.

Ün plüch qua, ün tschüf là el chatt' amo bain;  
per misra prunetta as stordscha sa rain.  
El tacha alura, eir schi nun ais bler,  
las raschladüras vi dal latscher. — —

Uschè fa 'l scriptur in seis föglis e quaderns  
revista, in tschercha d' prodots na moderns.  
El chatta, po esser, in lös fich dispers  
amo alch chanzun, alch istorgia, alch vers;

s' impaissa: A l' ün o a l' oter — chi sa? —  
servir pon quaists vanzs eir in temp da s-charsdà,  
e 'ls lia insembel in pitschen volüm;  
a quaist il stampader regala la glüm.

E quai ch' el per cas ha insembel raschlà,  
vain sainza pretais' als lectuors preschantà. —  
Ch' els fatschan l' adöver, chi 'ls para adat!  
Schi 'ls plaschan be ün pa, ais l' autur satisfat.

---

## 2. Linguach matern

(suainter Schenkendorf).

O prüvà linguach matern,  
co t' amain nus in etern!  
Prüma silba, ch' ün inclegia,  
da la mamma clam d' amur,  
prüma frasa, ch' ün balbegia,  
'vais implì meis cour d' ardur.

O favella dals babuns,  
quant amabels sun teis suns!  
Sch' in teis pled s' approfundescha,  
s' chatta grand' richezza laint,  
e que para, ch' el unescha  
cul passà il temp preschaint.

In lingu' estra eir savain  
ans exprimer vaira bain;  
ma, scha al Suprem dir grazcha  
vlain, d' amur far confessiun,  
tai dovrain, custaivel s-chazzi,  
in bandusa comoziun.

## 3. Excelsior

(suainter F. Dahn).

Giain da bun anim sün stippa muntagna!  
Spelma, chavorgias nu tmair, char infant!  
Spranza ha dmura sün ota chadagna;  
vezzast, l'azur sur la pizza guadagna  
saimper plü spazi al tschêl imnatschant.

Nüvlas cuvernан e tuorbla tschiera  
tuot la vallada, la prada e 'l god.  
Vè! Tras s-chürdüm e suldüm e fümera,  
cunter lütschaiders e tuns e canera  
giain nus insembel adüna vers l' ot.

Guarda, cha uossa straglüscha clerezza  
 là suot il piz sül amabel, verd tschaint!  
 Guarda! Intant cha cugìò in s-chürezza  
 plandscha il muond, bod lasü in sgürezza  
 man stain in man strusch al blau firmamaint.

---

#### 4. Mi' orma svoula.

Tras stretta chavorgia romura  
 nos En, dand sagls e s-chümand;  
 in üert davant mia dmura  
 am tschaint, la val contempland.

In flur ais la pradaria;  
 culaischems ondagian cul vent;  
 l' intera cutüra ria —  
 mi' orma svoula davent;

la va cun charrozzas avertas  
 tras legers cumüns sül stradun;  
 la va sco cun alas alertas  
 tras l' ajer balsamic da gün.

Vers tai la svoula, ma chara,  
 sco svoula dal sain il sun;  
 ta vusch d' udir güst am para,  
 chantand ta plü bella chanzun.

Mi' orma güvl' e chantina  
 cun tai aint il eter beà;  
 eu impl il magöl cun Vuclina  
 e 'l baiv in tia sandà.

---

## 5. La chanzun populara

(suainter A. W. Hildebrand).

Cun tia s-chetta melodia  
meis cour dalönch hast inchantà.  
La misteriusa tia magia  
m' ha intretschè, sco cur chi ria  
marusa a l'amant beà.

La mamma cun sa vusch sonora  
t' chantet suvent dasper meis let.  
Eir sch' eu cridaiva surtuotora,  
il chant matern bainbod restora  
l' infant e 'l fa schmanchar il led.

E fand il rinch sün verda prada,  
eu tai udit in quaid löet;  
il mat at chant' a si' amada  
ed il sudà, chi per l' armada  
la guardgia fa sül post sulet.

Ed uossa, ch' eù in estra terra  
chattet recover suffizchain,  
cumpagna m' est tü zuond sincera  
e 'm clamast cun bandusa tschera  
il chant ladin darcheu immaint.

## 6. La furtüna — ün sömmi.

O di 'm be, che chi 't maina,  
tai, flaivel utscheïn,  
tras sféra pac seraina  
e vasta sainza fin!  
Hast viss tü ma muntagna,  
la scossa cul pastur?  
Hast viss eir la chadagna  
da pizza nel azur?

T' hast fors' aint illa prada  
zuppà intanter fluors?  
Hast observà per strada  
meis frars e genituors?  
Sper l' üsch da ma chasetta,  
sün quel bancet da lain  
hast viss inchün, chi 'm spetta,  
cridand, chi 'm voul tant bain?

Permett' amo, ch' eu 't rova  
da 'm confessar, perche  
cha üna patria nova  
tü vast tscherchand, utschè. —  
Ah schi! Vers tai adüna  
guardand, am vain immaint:  
Ün sömmi ais furtüna,  
chi pass' in ün mumaint.

### 7. Tour cumgià

(a rav. O. Guidon †).

Tour cumgià ais greiva paina  
da quel lö, chi 'ns ais tant char;  
tour cumgià da quels chi s' ama,  
bandunar tuot quai chi's brama;  
quaist destin ais zuond amar.

Tuor cumgià in plaina vita  
dad ün' ouvra, ch' ün creet,  
ais per l' hom sco üna morsa,  
chi al piglia fla e forza,  
cretta, spranza our dal pet.

Tour cumgià, cur l' ais cumplida  
d' üna vita la lavur,  
per giodair in buna feda  
da seis fats in pasch merceda,  
ais la sort dal bun pastur.

## 8. Cumgià.

Id ais fraid, la not ais s-chüra,  
 naiv cuverna la cutüra.  
 Tour cumgià il cour rinserra,  
 ir a l' ester: trist destin,  
 chi' m turmainta sainza fin.  
 O Segner, maina,  
 tuot bain ordaina!  
 Lascha' m turnar  
 i' l lö, chi' m' ais tant char!  
  
 Stat adieu, frars, bap e mamma!  
 Il dovair dalöntsch am clama,  
 eu bandun dal cour la brama,  
 la furtüna vegn tscherchand  
 aint pel muond, ch' ais vast e grand.  
 O Segner, maina ect.  
  
 O vus spuondas splenduraintas,  
 vus forestas sumbrivaintas,  
 vus chamannas sten brünaintas,  
 vus vadrets al firmamaint,  
 eu as tegn bain ad immaint.  
 O Segner, maina ect.

---

## 9. Sül Piz d' Arina

(imitaziun d' üna chanzun populara francesa)

Ella: Sül Piz, sül Piz d' Arina  
 ais ün planet zuppà;  
 in quel n' ha eu bler cridà.  
 Là' s vezza l' Engiadina;  
 là m' ha ün bel di da gün  
 palesà si' amur qualchün.

Tuottas: Üna veglia chanzun ans quinta,  
 cha' l giuven figl d' ün rai  
 a giuvna brav' e distinta  
 güret seis cour e sa fai.

Ella: Sül Piz, sül Piz d' Arina,  
 suot quel grand tschêl serain  
 m' ha'l dat dad amur ün pain,  
 m' ha'l dit: «Adieu, charina,  
 eu part, vegn dalöntsch davent,  
 adün' at' varà eu jent.»

Tuottas: Stuand el ir in guerra,  
 il giuven figl dal rai,  
 el dschet a sa maschnera:  
 «Ama'm, sco ch'eu am a tai!»

Ella: Sül Piz, sül Püz d' Arina  
 eu vegn quel di minch'an  
 e' m tschaint aint immez quel plan  
 e guard tras l' Engiadina:  
 Mai plü meis marus nu' m vain;  
 mai plü meis marus nu' m vain!

Tuottas: Cur ch' el turnet d' la guerra,  
 il giuven figl dal rai,  
 la giuvna eir' in terra,  
 morta, fidel' a sa fai.

## 10. Malavra

(Strasora).

S-chüra not sco bocca d' luf. —  
 Mais da fain cul greiv seis giuf  
 ha balchà bainbod la vita  
 in cumün. — La plövgia gritta  
 ferm sbagnatscha. — Uras passan. —  
 Tuot chi dorma. Be l' astella  
 chanta tras la lungarella;  
 seis accords plan plan as sbassan,  
 e seis guots stalivan. Naiv  
 crouda in bilocs da tschêl;  
 bofs romuranc tras chamins;  
 tets e vias, l' üert, la saiv

s' cuernan, ornan cun ün vel  
 grisch lur let, sumgiant a quel  
 d' aspers, stanghels cuntadins. —

Qua s' oda s-chellas,  
 talocs e brunzinas,  
 müjöz da vadellas,  
 da vachas e trimmas,  
 sgierlöz da pastriglia  
 e sbrais d' buobaniglia,  
 e qua e là  
 s' invüdan fanestras,  
 as avran las portas,  
 las cuorts cun romur,  
 e fatschas surpraisas  
 e gniffas tuot estras  
 s' preschaintan sün cuccers,  
 balcuns suot e sur.

Alura pür trottan  
 lanternas sün plazza;  
 que para, chi sotan  
 d' uits our sün giassa;  
 bilocs las circondan  
 sco soms d' aviöls.  
 Plain sön sun ils ögls  
 da mas-chels e femnas;  
 bastuns e blastemmas  
 e s-charpas, chi fuondan,  
 e trida vestonda;  
 sbragizi pertuot  
 tras il s-chür da la not. —

— Finalmaing retuorna  
 suldüm süllas vias,  
 cha lozza cuverna  
 e naiv alguantada.  
 D' las vachas l' armada  
 minchün ha las sias;

suot tet ed a cuvel  
 s' rechatta il müvel;  
 las glüms van s' stüdand,  
 e 'l fracasch va 's balchand. —

Uschea disturba durant la stà  
 malavra il sön na be üna ja'  
 al paür d' Engiadìn' e cuntuorns in Grischun,  
 causescha travaglias, pissers a mantun.

A la fin el quinta cuntaint sa scossa,  
 l' admir' e l' observa, palpand pel ed ossa,  
 s' impaissa: Scha Dieu ans preserva dal mal,  
 da zoppin' e dad oters flagels d' ans passats,  
 schi d' utuon ingrandesch fors' eir eu 'l chapital,  
 ch' eu lasch a seis temp sper sandà a meis mats.

## 11. Char sulai.

Char sulai, pür s-choda  
 cun teis razs sublims,  
 que chi vita gioda  
 sül terrain, in flüms!

La daman adura,  
 incotschnind noss munts,  
 dist: Uman, lavura,  
 scha giodair voust duns!

E la saira clamast:  
 Va bainbod al pos,  
 nouva forza bramast,  
 dorma quaid e clos!

Vaira vita regna  
 be in clerità;  
 tia glüm mantegna  
 verd il god, il pra.

O, quant sul am para  
d' esser tuot il muond,  
cur cha la tschiera  
l' ins-chürescha zuond

Eu perque adüna  
cler bram e sulai  
dals prüms dis in chüna,  
fin ch' ais vit' in mai.

## 12. Il viandan

(suainter J. v. Eichendorff).

A chi Dieu far voul grand' algrezcha,  
quel lascha 'l ir a viagiar,  
a vair miraculs d' mincha spezcha  
in munt e val, perfin sül mar.

Auals murmuran tras la spelma;  
güzellas güvlan sü vers l' ot;  
ils peschs, chi noudan sur la belma:  
alleger ais, felizi tuot.

Sün il bun Dieu minchün as fida.  
Perche nu dess eir eu' m fidar?  
Sur tschél e terra el decida;  
el maina bain eir meis da far.

## 13. Sü da cho, amih!

(suainter V. Schneider).

Sü da cho, amih! Il mel invlida,  
scha nevruott' at porta il destin,  
sch' eir sün l' asper mer ti' orma crida,  
sü da cho! Il mel ho eir sa fin.

Sü da cho, amih! Algrezcha gioda,  
admirand da quaista vita flur!  
Sur il mer s-chümant vo vent, chi s-choda,  
regna' l spiert etern dal creatur.

Sü da cho, amih! In ota sfera,  
 cur surleivg nu do pü nos savair,  
 la bellezza d' quaista pouvra terra  
 so be l' art al spiert umaun fer vair.

Sü da cho, amih! Lavura, chaunta!  
 La lavur do forza, do vigur;  
 la chanzun do vita, bram' arsainta  
 ed implaunta aint il cour l' amur.

---

#### 14. Serenada dal barcharöl

(suainter G. Keller).

La not expost ha seis clinöts  
 d' argient al tschêl serain;  
 il lai resplenda tuot seis fös  
 vers tai, sco 'l limpid stagn.  
 Pro tai eu vegn in quaida not;  
 at sdaida, chara, bod!

Vibranta glüm splendura lam;  
 ma barch' ondagia spert;  
 vers teis giardin, vers teis sulam  
 il rembel mouv alert.  
 Pro tai eu vegn in quaida not;  
 at sdaida, chara, bod!

Eu saint, cha 'l muond respir' amur  
 sül lai, dasper ta chà;  
 las stailas rian nel azur;  
 instant eu sun rivà.  
 Pro tai sun gnü in quaida not;  
 at sdaida, chara, bod!

---

## 15. Eu spet.

Eu spet e spet il meis amà,  
 ch' el vegn' am dar la buna not;  
 eu'l spet sül banc dasper ma chà. —  
 O, be ch' el gniss, e quai bainbod! —  
 Be sul suletta qua'm rechat,  
 ed el nu'm vain, quel chazzer mat.

Chi sa, sch' el' vess müdà colur?  
 Sch' ün' otr' il tress cun plü success?  
 O sch' el fess schnöss da mi' amur,  
 pel nas fin hoz manà am vess?  
 Na, quai nun ais, am disch meis cour,  
 uschigliö da malavit' eu mour. —

— Aha, el vain, quel benedi!  
 Eu od seis pass davo quaist mür;  
 el svoul' eir hoz sco minchadi  
 in mia bratscha our dal s-chür.  
 O vè, pür vè, meis char marus,  
 pür vè e brancla' m adascus!

---

## 16. Saira.

Da l' ota, bella spuonda  
 sulai ir tramuntand  
 eu vez, cur ch' el inuonda  
 il god e'l piz glüschain.

Sumbrivas lungas paran  
 d' enveloppar il muond,  
 e nüvlas cotschnas giran  
 intuorn a l' orizont.

Pertuot ais quaid silenzi,  
 in munt e god e val;  
 utschels e fluors s' drumainzan,  
 murmura be l'aul.

Ed uossa, cha natüra  
 plansieu al pos voul ir,  
 l' uman eir as retira,  
 suspenda seis agir.

---

### 17. Not aint il god

(suainter Eichendorff)

Vast ais il god; suldüm qua plandscha,  
 comova meis pet.  
 Surour munts, valladas tendscha  
 silenzi nocturn perfet.

Dal cumün il sain be, chi suna  
 e trembla tras l' ajer serain,  
 sömgiar fa la sulvaschina,  
 chi dorma lam zuond e bain.

Alura ün vent las chaplinas,  
 el metta in movimaint;  
 sco scha'l spiert tras fruonzla e tschimmas,  
 il spiert gess da Dieu tuotpussant.

---

### 18. Sül far not

(suainter Fr. Oser)

Tuot ais quiet. Be'l cler sulai  
 s' giovaint' amo, in tramuntand  
 e dal frus-cher dasper il lai  
 d' ün utscheïn as od' il plant.  
 Va tras la fruonzla flaivel sun,  
 sco füss dal zefir urazchun.  
 Tuot ais solen; tuot ais quiet;  
 dà' m dutsha pasch, bap, aint il pet!

---

## 19. Nadal.

Nadal, d' inviern la festa tant bramada,  
annunzchast pasch a tuot la cristantà,  
la regordand a quel, chi l' ha salvada  
our da s-chürdüm chafuolla e puchà.

Tai ouravant pertuot ils pitschens spettan;  
vers teis bös-chin as drizzan ögls glüschaunts.  
Fa, cha sas glüms ün raz divin tramettan  
aint in sensibels cours ed innozaints!

Per ch' els inklejan, cha l' amur eterna,  
cha' l Spendradur al muond ha revelà,  
invilgia, ödi e noschdà cuverna  
e vendscha uossa ed assaimpermà.

## 20. Prümavaira.

(Versiun dal tudais-ch.)

Felizi eu sun, cur sorria  
il mai cun sas fluors dapertuot;  
vegn leger ma via,  
mi' orm' ils liams tuots ha ruot.

Dal glatsch sun sfrachadas chadainas;  
balsamic e lam ais il vent;  
meis sang tras avainas  
festina e batta buglient.

Dal pet la chanzun qua strasuna,  
chi sdaïsda cun forza rebomb;  
l' aual ferm frantuna;  
dalet infinit ais nel muond.

## 21. Violas.

(Versiun dal tudais-ch.)

Darcho violas eu vez in flur;  
pro ellas vegn a tramagl ün pa  
sün quella muotta, cha lur azur  
cuntuorna da seis balsamic fla.

Eu vögl imprender ad esser modest  
e m' allegrar aint il fuond dal cour,  
sco ch' ellas fan cun sincer, bel gest,  
dand lod e grazcha al creatur.

Ad el ingrazch eu pel grand plaschair,  
chi hoz comov' e m' elev' il pet.  
Ad el dun lod seguond meis pudair  
per sià buntà tras chanzun da dalet.

## 22. Frais-cha flur

(suainter L. Bauer).

Frais-cha flur, a nouva vita  
bod at sdaisa chod sulai;  
odast, cha'l favuogn at clama  
tras la föglia, tras la ramma?  
In dalet il muond s' infitta,  
cur chi tira il vent da mai.

God, eir tü bainbod renascha,  
taimpel sajast verd al muond!  
Cur chanzuns in tai strasunan,  
cur auals tras tai frantunan,  
cur süls cuolms lavina scriuoscha,  
o, co am quel bel temp eu zuond!

Orma, uoss' eir tü palainta  
vair' algrezcha, zart' amur!  
Far chalenders poust avuonda,

cur a naiv fraidüra sguonda;  
uossa spranz' il cour resainta,  
vita ha sur la mort vendschur.

---

### 23. Sunasancha da Pasqua

(suainter A. Böttger)

La sunasancha da Pasqua fa  
renascher pövels e prada.  
Millieras d' vuschs intunan già:  
La prümvaire' ais turnada!

Il god respira, la terra dà  
flurinas e zarta erbetta;  
viola as sfruscha seis ögl strasögnà,  
s' allegra d' nun esser suletta.

La glüm, chi dà vita, penetra pertuot,  
fa crescher bos-chagl' e granezza;  
perfin sün muntagnas da di e da not  
ün vent va d' immensa charezza.

---

### 24. Festa da chant.

Tras nossa val strasuna chant bramà;  
la lodola güvla in prad' e god;  
da milli fluors ais nos pajais fittà  
fin pro' l vadret glüschaient e fraid sü l' ot.

E sunasancha trembla sco'l zefir,  
tras la cutüra verda resunand;  
romura l' aual, frantuna ferm respir;  
lavina scruoscha, giò dal munt rodland.

At sdaisd', uman, eir tü cun chant e sun!  
L' inter' essenza hoz voul s' allegrar;  
sulai e clerità dan aint il tun,  
balsamic vent noss'orma voul s-chodar.

Rebomba dapertuot, o melodia!  
 Va aint il cour, va aint cun cling vernal!  
 Dispuona 'l tü, be tü a dutscha armonia  
 cun tuot il böñ, chi' ns spordsch' il di festal!

---

### 25. Bainbod

(suainter ün text sursilvan).

Prümavaira sventular  
 cul favuogn fa ta bandera!  
 Sch' eir l' inviern fa trida tschera,  
 lönch nu po 'l cun tai luottar.  
 La funtana s' ha sdasdada,  
 chanta, chanta, giubilescha;  
 desideri crescha, crescha;  
 pür chi sbischa! La vallada  
 voul cun spranza t' abratschar.

Üschs e fnestras pür avri,  
 cha 'l sulai vegn' aint in stüva!  
 S-chatscha, cour, tü la sumbriva!  
 Spranz' at porta minchadi.  
 Odast, co chi van astellas?  
 Las chünnettas cuorran plainas;  
 ruottas, ruottas las chadainas!  
 Bod, bainbod vain cling da s-chellas,  
 lur', inviern, nu regnast plü.

Cur dal cuc strasun' il clam,  
 plan e spuonda spert s' infitta,  
 our da fossas sorta vita,  
 fögl' e flur ha mincha ram.  
 Früjas, chi ondagian, creschan;  
 fla d' algrezcha tuot respira,  
 fa renascher la cutüra;  
 legras scossas pasculeschan:  
 prümavaira, lur' est quà.

---

## 26. Il cuc.

La saira plain da spranza s' avanza  
 il giuven pasturet  
 vers chasa cun sa scossa, ed uossa  
 el od' il cuc dandet: Cucu!  
 Instant l' aual murmura,  
 la fruonzla quaid schuschura: Cucu!

Il mat va fand la guetta, repeta  
 planin e plü dadot  
 il clam; la ramma schloppa; el s' zoppa  
 sül bös-ch a l' ur dal god. Cucu!  
 Qua vezza 'l, chi 'l minchuna  
 Sep dal vaschin, chi suna: Cucu!

Davo ün ram el s' metta e spetta,  
 il cuc bain imitand.  
 Nos Sep cun sa pivina 's vicina,  
 il vair utschè tscherchand. Cucu!  
 Qua üna pusch' il tocca;  
 la piv' al croud' our d' bocca. Cucu!

---

## 27. Daman aint il god.

(Versiun dal tudais-ch).

Quaidezza regna dapertuot;  
 il god alpin, el tascha.  
 Be ün aual planin eu od  
 ad ir tras fögl' e dascha.  
 la fruonzla s' insömgia d' ün di beà  
 e scutta adascus. — — —

Taidla dal merl uoss' il chant sonor,  
 chi clama tras frus-chaglia:  
 «Sdasdai tuots, da l' alba amabel flor  
 annunzch' ün di da vaglia!  
 Tü, laudinella, pür svoula sü,

salüd' il tschêl e' l sulai cusü!  
La not uossa sto davent.»

L' arald adoza darcho sa vusch;  
intant al vain resposta.  
Sco sun da tüba dalöntsch, dastrusch  
bod güvlan ramm' e bos-cha.  
Parüsch'l e fringuel han dat aint il tun;  
il cuc, el suna il bombardun  
tras munt e val cun slantsch.

E da lontan rebomb' ün sain;  
seis cling cul chant as maisda.  
Nos cour, da dutscha brama plain,  
in zarts accords as sdaisda.  
Il muond inter ais be chant e sun,  
chi lura s' unesch' in la grand' chanzun:  
Lod, lod saj' al creatur!

## 28. Gün.

Giò da tschêl splendur;  
prad' e god in flur;  
alb be 'l piz sco l' argient;  
ajer chod, lam il vent;  
d' utschellins chanzuns  
tras la val, süls munts;  
aviöls van e splers  
svolazzand sur ils ers;  
Ja lavina  
spert festina,  
glischas spuondas sü vers l' ot  
liberescha  
d' naiv in prescha,  
e 'l pastur bainbod  
sun' il corn giò 'l god.

E la scossa, sclingiand,  
 va ad alp, s' allegrand  
 dal bel pas-ch, ch' ais zart sco 'n üert,  
 là chi prüja  
 sco 'na früja  
 e cundüja nouva vita tschert  
 sün il muot, gnü verd.  
 E l' activ cuntadin  
 va sül fuond da cuntin,  
 muond' il pra e ziercla l' er,  
 drizza laina  
 tuot ordaina,  
 per ch' apaina  
 ch' ais il fain madür,  
 possa 'l fotsch tour e cuzer.

---

## 29. In pramaran.

Che delizcha, che dalet  
 in meis pramaran  
 il mais gün, cur suot seis tet  
 mias vachas stan!  
 Qua sun eu svess patrun;  
 cul rai sül ot seis trun  
 nu brattess, nu brattess,  
 gnanca sch' el vuless.

Sülla spuonda plain sulai  
 ais il pas-ch in flur;  
 s-chellas clingian intuorn mai,  
 fand eu ma lavur.  
 Qua sun eu svess patrun etc.

Sülla ramma ün fringuel  
 chanta lam e bain,  
 ed il tact cun seis martel  
 batt' il pichalain.  
 Qua sun eu svess patrun etc

Sülla pizza in splendur  
 spelms stan e vadret;  
 aint il ajer ün uxtur  
 fa seis girs sulet.  
 Qua sun eu svess patrun ect.

Ferm rebomba ma chanzun,  
 clingia cul zampuogn.  
 Sch' eir be sul sulet eu sun,  
 tuot cuntaint marmuogn:  
 Qua sun eu svess patrun ect.

### 30. Intuorn St. Gian.

L' Engiadina bella ais  
 ün vouta l' an,  
 cur ch' in flur sta nos pajais  
 circ' intuorn St. Gian,  
 cur ch' in god e sün pas-chüra,  
 sülla spuonda, in planüra  
 las grusaidas in blerüra  
 sper genzianas, primlas stan:  
 O bel temp intuorn St. Gian!

Our dal cotschen lur rösin  
 glüscht' il verd fögliam,  
 e 'l ruschè sco 'l s-chet rubin  
 brilla la daman,  
 gial salvadi, leivr', amblana  
 suot las fruos-chas fan lur tanna,  
 chattan qua vivanda sana;  
 s-chellas clingian nan dal plan:  
 O bel temp intuorn St. Gian!

Pür cugiò chi regna stà,  
 pür ch' in val e plan  
 haja l' ajer madürà  
 frajas, erb' e gran.

Süllas alps in frais-ch' otezza  
da la zuondr' e giocc' asprezza  
mitigesch' in sa bellezza  
la grusaida an per an  
eir amo davo St Gian.

— Ma immez las fluors ans vain  
trist presentimaint:  
Al flurir spassir cunvain,  
cuort ais seis mumaint.  
Bod gnarà la fotsch güzzada,  
bod grusaid' eir s'ha serrada,  
bod taschair sto la chantada,  
bod, bainbod sarast lontan,  
o bel temp d' intuorn St Gian!

### 31. Mieu lö natel.

Sün spuonda sulagliva  
sto 'l pitschen lö natel,  
chi saimper am riainta  
e chi mieu cour cuntainta,  
cur ch' eau m' approssm ad el.

Las pitschnas sas chesettas,  
sieus brüns, antics, talvos,  
ils üerts, las saivs, las plazzas,  
las portas, fnestras, giassas  
eau vez immez ils prôs.

E lo sur la baselgia  
cul pitschen, vegl clucher,  
lo sto qualchün, chi m' ama,  
lo staun il bap, la mamma,  
chi' m' vezzan taunt da rer.

Be ch' eau pudess' adüna  
ir lo tar els a ster,

cun els semner la flüja,  
 partir plaschair, fadia  
 i 'l lö, chi m' ais taunt cher!

---

### 32. Dieu preserva la Svizzra!

Da vadrets e spelma sflada  
 asper vent, chi cling' e clama  
 giò dals munts, tras la vallada,  
 svaglia forz', arsainta brama  
 d' esser pövel, chi nu temma  
 prepotenza e viltà:  
 Dieu t' preserva, Dieu t' mantegna,  
 Svizzra, hoz e saimpermâ!

Chüna dad eroes est statta,  
 chi defais t' han milli giadas;  
 tras lur sang in fö, cumbatta  
 libertats fuon acquistadas,  
 cha teis figls predschar san uossa  
 sül pajais ed in cità,  
 conservar fin a la fossa  
 vöglan hoz e saimpermâ.

Fideltà a nossa terra,  
 a noss baps, a nossas mammas  
 nus gürain, a ta bandera,  
 cur in privel tü ans clamast.  
 L' adversari teis sto ceder,  
 eir sch' el füss potent, sfruntà:  
 Vögl' il Segner tai proteger,  
 patria, hoz e saimpermâ!

---

### 33. Nossa Rezia.

O Rezia, tas muntagnas, teis gods e teis vadrets,  
 tas vals e tas champagnas, teis bels cumüns immez,  
 a teis infants i'l ester nu vegnan our d' immaint,  
 l'amabla regordanza als rend' il cour cuntaint.

Tas früjas süllas spuondas, ta frütta giò 'n bels plans,  
 teis flüms cun lur cascadas, sül ot teis pramarans,  
 ta verda pradaria, dal pascul bella flur,  
 ingiò d' instà rebomba il güvel dal pastur:

Que tuot mai nun invlida il grisch, ingiò ch' el ais;  
 el sa stimar eir oters, el ama seis pajais,  
 ch' ais rich na da richezzas, ma d' ota majestà;  
 seis pövel, el lavura e gioda libertà.

### 34. 1. Avuost.

Cur mais da fain terminà ha sa cuorsa,  
 vain di festal per ün inter pajais.  
 Il sain da not lura suna cun forza  
 tras las muntagnas, sur cuolms e sur lais.  
 O patria chara, hoz teis infants  
 comemoreschan ils fats dals pardavants.

Sün muots e sün pizs fös glüschaunts as invüdan,  
 simbol da libertà e d' uniuon.  
 Tras lur favella teis figls as salüdan  
 dal Lai Leman fin al chantun Grischun.  
 O patria chara ect.

E radunats süllas plazzas e stradas  
 stan vegls e giuvens pro discuors e chanzuns.  
 Vihs decorats e citads glüminadas  
 perdütta dan d' amur invers noss babuns.  
 O patria chara ect.

### 35. Il Rain

(suainter F. Rohrer).

Rain, schi di 'm, ingiò est nat?  
 Chi at ha la chüna dat?  
 Chi diret ha tia cuorsa?  
 Chi at det vigur e forza?

Illas alps n' ha viss la glüm,  
 sü pro 'ls grischs sun stat il prüm;  
 nella Rezia gnü sun grand —  
 largias vals, eu 's fetsch bivgnand!

Passa, Rain, sur nos cunfin!  
 Glorgia saja teis destin!  
 La chanzun da tias uondas  
 ferm strasuna vers las spuondas:

Da las Alps in früda vegn,  
 eu giò 'l plan nu chat retegn;  
 a ma patria bler m' impais,  
 tai salüd, o bel pajais!

Rain, tü flüm immens, profuond!  
 Majestus vast tras il muond.  
 Dutsch repos il mar at detta!  
 Tia brama là 's quieta!

Ma ti' orma inavo  
 vers la patria vain darcho,  
 cur il vent impetuous  
 batt' il spel'm al Piz Badus.

### 36. A ma patria

(suainter G. Keller).

O ma patria, o pajais sublim,  
 quant da cour adüna am eu tai,  
 bella rös', eir sch' otras fluors per mai  
 sun spassidas, tü 'm dast dutsch parfüm!  
 Elvezia, ma patria, pajais sublim!

Leger, sch' eir povret, giand vagand pel muond,  
vez eu pumpa, majestà da truns;  
confruntand quaist glüster cun noss munts,  
sun superbi da ma patri' eu zuond.

Cur lontan at füt, char pajais natal,  
quant suvent sentit suldüm, dolur!  
Ma bain spert l' algrezch' avet vendschur,  
vzand cumpagns, amis da mia val.  
Elvezia, ma patria, pajais natal!

O ma patria, tü meis unic bain,  
scha bod l' ultim' ura s' approssmess,  
sch' eir sustegn da 't dar nu 'm füt concess,  
quaïd repos dà 'm tü i'l lam teis sain!

Büt alura giò da la vit' il fasch,  
vögl al Segner eu da cour rovar:  
Tegr' in chüra, bap, quel lö tant chiar,  
chi rinserra meis intim relasch!  
Ma patria, l' Elvezia, meis char paja s!

### 37. Increschantüm.

Un bel cumün vez tanter fluors,  
daspera cuorra l' En,  
sün stippa spuonda acras, tuors,  
in fuond vadrets e spelm.  
Eu od ün paster a chantar,  
da scossas quaïd s-chellam:  
O bella val, o lö tant char,  
bainbod da 't vair eu bram.

Un sömmi plain felicità  
m' adoza sü vers l' ot;  
meis ögl dal munt eu tegn drizzà  
sül lai, sün prad' e god.  
Ma güst ch' eu vögl ün güvel dar,

am sdaisd, e trist eu clam:  
O bella val, o lö tant char,  
bainbod da 't vair eu bram.

La brama m' arda da pudair  
darcheu turnar a chà,  
d' ir cul schluppet süls munts, giodair  
noss drets da libertà.  
Linguach matern vuless tschantschar;  
perche surtuot quel am:  
O bella val, o lö tant char,  
bainbod dat 't vair eu bram.

### 38. Ingreschantüm.

A tai m' impais, o char pajais natal,  
in estra, sula, monotona terra.

A tai m' impais, lontana, bella val,  
a teis infants, a lur favella chara.

— Chanzun rumantscha clingia, lamma,  
melodius, armonic chant eu od —  
Immensa uossa ais dal cour la brama:  
O, sch' eu pro tai pudess ~~turnar~~ bainbod!

— Qua vain fidanza, vain surlevgiamaint  
in mai; meis cour, plan plan el as quieta;  
meis ögl as drizza vers il firmamaint,  
ed al Suprem el uossa tuot remetta:  
Ingiò nus eschan, quai n' importa bler,  
scha vair' amur pels noss nus resentin,  
per nossa val, nos bel pajais inter,  
per seis custüms, per seis linguach ladin.

### 39. Salüd a la patria.

Muntagnas glüschainas cun pizs e glatschers  
e spuondas verdaintas cun prada ed ers,  
cluchers vez in sömmi, il cling od d' ün sain:  
O char' Engiadina, o patria, sta bain!

Eu 'm lasch fich increscher, m' impais di e not  
 a quella chasetta, a l' üert sper il god;  
 la dutsch' algordanza meis ögl fa gnir crain:  
 O char' Engiadina, o patria, sta bain!

Meis cour be giavüscha, bainbod da pudair  
 la pasch da la pizza, seis ajer giodair.  
 Prüvada favella preschainta am vain:  
 O char' Engiadina, o patria, sta bain!

Lontan d' ma vallada am puondscha dolur,  
 adüna tristezza in mai ha vendschur;  
 eu clam in ma brama e chant cun cour plain:  
 O char' Engiadina, o patria, sta bain!

#### 40. A l' ester

(suainter Alf. Tuor).

Am rechat in terra estra;  
 stun qua bain e sun cuntaint;  
 da dalöntschi già la furtüna  
 muoss' a mai seis ögl riaint.  
 Ma cun larmas ill' ögliada  
 guard suvent eu sur il mar:  
 Chara patria, tai a l' ester  
 n' ha imprais pür a predchar.

Eu m' impais a mia chassa,  
 a noss munts, a verdas vals,  
 a meis muvel, mia prada,  
 a noss lais e clers auals,  
 a la naiv, a l' aria fina,  
 a nos En, seis romurar:  
 Chara patria, tai a l' ester  
 n' ha imprais pür a predchar.

Che po l' ester bain eir spordscher  
 a mai pover muntagnard?  
 Vaira, dretta cuntantezza  
 chat pro vus be, bod o tard.

E scha eu avess uoss' alas,  
 sur il mar vuless svolar  
 in ma patria, ch' eu a l' ester  
 n' ha imprais pür a predchar.

---

### 41. A l' emigrant

(suainter Alf. Tuor).

Tü voust la patria bandunar,  
 i 'l ester bramast ir?  
 Da l' otra vart dal grand, vast mar  
 furtüna voust gurbir?  
 Che mâ là via tuot dandet  
 t' ha fat glüscher ils ögls?  
 Nun hast plü lö suot l' ajen tet  
 in chasa da teis vegls?

Nu chattast qua tü pascul verd  
 suot nos bel tschêl serain?  
 Nun ais dad ers e god cuvert  
 a l' En eir bun terrain?  
 Nu glüschan sco 'l rubin suvent  
 nos pizs al tschêl azur?  
 Nun odast tü noss sains gugent  
 dar glorgi' al creatur?

Pür craja 'm! Bod tschert bramast vair  
 quel vegl, prüvà löet;  
 pür sapchast! Saimper sto mantgnair  
 ti' orma seis portret.  
 Pür va nouvs privels a tscherchar  
 i 'ls razs d' ün nouv sulai!  
 Vulessast bain ün di turnar —  
 nu tuornast forsa mai.

---

## 42. Retuorn.

In esters, bels pajas sun stat,  
n' ha viss citads e 'l mar;  
ma dutscha pasch ninglur m' ha dat  
il muond cun tuot seis far.

Eu fet fagot e returnet  
a chas' e füt cuntaint.

O chara val, prüvà löet,  
be qua dalet eu saint.

Il frais-ch respir da noss vadrets,  
lur pizs al tschêl azur,  
ta prada verda aint immez,  
teis gods ed ers in flur:  
Que tuot meis cour allegra zuond,  
al dà darcho vigur;  
o val da l' En, in tuot il muond  
paragl nun ais ninglur.

In tai vögl viver e murir,  
eir scha'l destin m' ais s-chür.  
Suot l' ajen tet nu vögl flippir,  
eir scha'l cumbat aisdür.  
Be ch' eu nu stopcha ir davent  
mai plü da mia chà,  
schi vögl desdir ad or, argient  
ed esser furtünà.

## 43. Salüd a l' Engiadina.

O bell' Engiadina,  
a tai "pens suvent.  
Qua vez eu ta pizza,  
ornada d' argient,  
tas spuondas, planüras,  
cuvertas da fluors,  
dad ers e bos-chaglia,  
chamannas e tuors.

Tü unica val,  
char lö natal,  
a vus eu tramet  
salüd cordial.

Immez pradaria  
observ ün cumün;  
tras spelma, chavorgias  
srantuna teis flüm.  
Sül grip, ingiò staiva  
d' ün temp il chastlan,  
tschuettas, corviglias  
lur gnieu qua hoz fan.

Tü unica val,  
char lö natal,  
a vus eu tramet  
salüd cordial.

Sün alps e pas-chüra  
ais vita, dalet;  
là saglian las scossas,  
chamuotschs sül vadret.  
L' utuon il chatschader,  
fand üs da seis dret,  
tras munts e chavorgias  
el va cul schluppet.

Tü unica val,  
char lö natal,  
a vus eu tramet  
salüd cordial.

#### 44. La terra dals babuns

(suainter H. Leuthold).

Tü serrast, terra sancta,  
nos muond inter in tai.  
Vain ura alarmanta  
per patria e fai,

schi in battagl' arsainta  
 teis figls nu cedan mai.  
 Tü serrast, terra sancta,  
 nos muond inter in tai.

Dals chars babuns memorgia  
 dess ester mai toccar!  
 Teis prosperar, ta glorgia  
 nus tuots vulain chürar.  
 E tschert' ais la victorgia  
 al bratsch dal muntagnar:  
 Teis prosperar, ta glorgia  
 nus tuots vulain chürar.

Da sang bagnada füttast,  
 o terra dals babuns;  
 mantgnüda libra gnittast  
 in vaincheduos chantuns.  
 Ed hoz ils figls, ch' unittast,  
 as güdan sco fradgliunzs:  
 Da sang bagnada füttast,  
 o terra dals babuns.

#### **45. La guardgia svizzra.**

Tras munts e vals sco ferm orcan  
 il clam da guerra va;  
 l' Elvezia pronta, l' arm' in man,  
 sül post la guardgia fa.  
 Sgrischus rebomban ils chanuns  
 dadour pro 'ls chantunais;  
 ma 'l svizzer sa sco 'ls vegls babuns  
 defender seis pajais.

Noss antenats, in Dieu 's fidand,  
 las lias han gürà;  
 els quellas han, lur sang spandand,  
 in privels preservà.

Eir nus, chi 'vain ertà lur duns,  
al muond hoz fain palais:  
Defender 'lain sco 'ls vegls babuns  
nos bel, nos char pajais!

Sch' ün inimi fadiv, sfruntà  
passar 'less noss cunfins,  
schi tschert cha quel cul bratsch armà  
dal svizzer far sto quints.  
Noss corps repar in vals e munts  
faran, sper flüms e lais;  
defender 'lain sco 'ls vegls babuns  
nos bel, nos char pajais!

#### 46. Cumgià dal guerrier.

Dasper il bügl al far dal di  
'vaiv' ün bel pêr ils mans uni;  
il chiern tant sul chantaiva;  
la matta scuffondaiva;  
seis char marus in guerra  
stuaiv' ir, in estra terra.

Ill' aua vezzan lur portret;  
lur lefs s' approssman in' grand led  
per tour cumgià cun larmas  
avant d' ir suot las armas. —  
Las uondas plan tremblaivan  
sco 'ls lefs, chi as toccaivan. —

Dandet trumbettas fan frantur,  
il tact rebomba d' ün tambur,  
e 'l giuven, sblach in fatscha,  
s' delibr' our da sa bratscha. — —  
La matta, tuot surpraisa,  
a sia sort s' impaissa:

Scha seis amà turnar nu po,  
 perir eir ella sgüra sto. —  
 D' immensa malavita  
 as saint 'la sco trafitta. — — —  
 Cur passa bod l' armada,  
 la giuvn' ais — najantada.

---

### 47. Al cunfin

(suainter E. Zahn))

Trida guerra, sanguinusa  
 tras l' Europa uossa va;  
 nossa patria curaschusa,  
 l' arm' in man, la guardgia fa.  
 Cur la saira nossa pizza  
 s' colurescha in purpur,  
 vers ils cuolms l' ögliada drizza  
 plain fidanz' il defensur:

Scruoscha pür, orcan da guerra!  
 Sur noss munts ais tschêl serain;  
 na lontan, süll' aigna terra  
 stan ils meis, s' impaissan bain  
 a lur figl e frar, chi marcha  
 sü e giò sper nos cunfin,  
 tgnand in chüra quella barcha,  
 chi rinserra lur destin.

Ma schapür cha la strasora  
 nossas vals nu 'less schaniar,  
 nossa schlass' armada moura,  
 ant cha l' estra poss' entrar.  
 Frars, cumpagns, nus fain la lia;  
 mammas, baps, nus hoz gürain:  
 Sur noss corps be va la via,  
 chi offenda nos terrain.

---

### 48. Nadal 1914.

Nadal, tü portast grand dalet  
 nel muond inter als cristians;  
 pro nus tü vainst, cur tuot ais dschet,  
 s-chodand ils cours a pitschens, grands,  
 L' amur celesta  
 dà quaista festa  
 da sancha pasch a nus umans.

Quaist an eir vögliast tü portar  
 cun teis bös-chins iglüminats  
 als pövels grits dal guerragiar  
 cuffort a quels, chi sun chalchats!  
 Fa fin sün terra  
 a trista guerra,  
 dand nouva spranz' als dolurats!

### 49. Immez la burrasca

(suatnter A. Häberlin).

Ün vent potent,  
 ün fö tremend  
 l' Europa ha surprais;  
 l' orrend cumbat  
 balchà ais stat  
 sül frunt da nos pajais.  
 Sur seis vadrets, sur piz e val  
 s' adoza ün simbol;  
 d' excelsa duonna fuorma ha 'l,  
 in majestus, ot svoul.

Elvezia quaista duonn' ha nom,  
 chi 's pozza sün seis s-chüd;  
 ell' oda dals chalchats il clom,  
 as pin' a 'ls dar agüd.  
 Seis figls tuots güvlan, in la vzand  
 glüscher al tschêl serain:

O mamma, sch' tü 'ns vast ouravant,  
il muond inter nu tmain!

Ma ella culla crusch sül pet,  
cul sguard resolt, benign,  
da libertà, da pasch portret  
'la muoss' al muond malign.  
Cun anim san  
'la spordsch' il man  
als pövels grittantats,  
sperand, ch' in fin  
ün raz sublim  
discharma potentats.

### 50. Sunteri

(suainter W. Wolfensberger).

Els quaid reposan. Eir sch' ün di  
in s-charsa vita als gnit urdì  
cordöli, ödi ed amur,  
schi bod o tard füt stüz lur fö,  
s' han els retrats in quaist sanct lö,  
schmanchand in quel dalet, dolur.

Dal temp, da bsögn, calamità  
s' adoza plan l' eternità  
surour ils asters e 'l sulai. —  
Sco vegl chanuoss, in frais-ch' età  
in quaista sula lur cità  
ün di l' Etern clam' eir a tai.

### 51. In sunteri.

Els qua reposan,  
noss chars, ils trapassats.  
Nos spiert s' algorda  
hoz bain amo d' lur fats.

Ma ingiò posan,  
tascha l' algrezcha;  
neir la tristezza  
nun ils disturba.

E sur lur fossas  
glüscha ün aster cler;  
lam el splendura  
in cours, chi sun chalchats.  
Cun sa clemenza  
doluors el balcha;  
nel anim spranza  
darcheu l' implanta.

E quaista spranza,  
l' ans vivifich' il cour,  
l' ans dà la cretta  
in l' immortal' amur,  
chi spendra l' orma  
dal mal, l' adoza  
adün' incunter  
a la güsti' eterna.

## 52. Meis morts.

Cur sun sulet, in meis immaint  
s' preschaintan els, ils chars decess;  
eu 'ls vez sül let da mort, trats aint,  
e 'ls vez stendüts in lur vaschès.

D' la sour, chi pozza eir' als vegls  
e mamma d' chasa per nus tuots,  
las larmas paran in seis ögls  
da 'm dir: La chargia portast hoz.

Perche eu vegn e sto laschar  
duos suords ed ün meis char infant  
qui inavo. A tai, char frar,  
in tia chür' ils racumand!

Dal bap adün' ils ultims pleds,  
 cha sia bocca dschet a mai,  
 eu od lur cling tremblant e vez  
 a 'ls pronunzchar: Be s' abinai!

E mia mamma chara m' ais  
 preschainta, al spital soffrind,  
 co ch' ell' am disch il fat extais  
 e da turnar pro 'ls seis fa quint.

L' ais eir turnada lura bod  
 quieta, sainza plü far pled,  
 ais statta là be üna not  
 in naira chascha, sper seis let.

Ed uossa posan els tuots traïs  
 giò 'l sul sunteri d' nos cumün. —  
 Dal prüm pisser la chargia m' ais  
 levada spert dal crüi destin.

Els d' mia chüra nun han bsögn,  
 meis genituors, ch' han bler amà;  
 da 'ls surlevgiar il grand fatschögn  
 d' lur spiert afflit eu n' ha tscherchà.

Eir l' otra sanct' imprumischiun  
 eu vögl cumplir, plü bain ch' eu sa.  
 Dal muribund l' admuniziun,  
 in fin ch' eu viv, nu schmancharà.

Il fasch ais greiv. — Il tour cumgià,  
 el schmach' ed impl' il cour cun led;  
 ün quaid cuffort, el m' ais restà:  
 Els tuornan, cur ch' eu sun sulet.

### 53. Il pin terrà.

Giand hoz a sgiar süsom il god  
 ün pra sazchaivel e stentus,  
 chattet dal pin brus-chü ed ot  
 per terra, sech il trunc rammus.  
 Giosom, il cuort, ma gross metagl  
 bod eir' ars tras cul ir dals ans;  
 gualivas tschimmas sainza sbagl,  
 chi 'l substituivan, 'vaivan spans  
 lur ramma grischa sül terrain  
 dalöntsch intuorn in circuit,  
 e las ragischs cul alb lur lain  
 guardaivan, ruottas, sül granit  
 erratic, spars tras ils cuntuorns  
 da forz' immensa, sco 'ls trists rams. —  
 E contempland quaists rests enorms  
 intanter giocca e malams,  
 am gnit immaint, ch' avant blers ans  
 nus qua sezzaivan sül sternüm  
 pro 'l bap robust, amo infants,  
 cun nus la mamma — in schmurdüm:  
 La plövgia gniva sco cul cuagl  
 büttada giò dal tschêl s-chüri;  
 cun fracaschöz il temporal  
 as s-chadanaiv' adüna plü.  
 Immez pro 'l trunc sflamgiaiv' ün fö,  
 sün quel pozzà, nel chazzarol  
 bugliv' ad ün buglir caffè;  
 sper quel süjaiv' ün kittal mol.  
 Il pin brus-chü, bainischem ot,  
 spordschaiv' a tuots recover sgür. —  
 Però cur bain dastrusch giò 'l god  
 crudet sajetta tras il s-chür,  
 la mamm' in temma pos n' avet,  
 fin ch' el, a chas' ans tramettand,  
 il bap, suot plövg' il pra glivret,  
 pro 'l fö 's s-chodand da tant in tant. —

Decennis sun daspö passats.  
 Ils genituors, turnand minch' an,  
 sun debels, vegls intant dvantats;  
 dal bös-ch las tschimmas staisas s' han.  
 Ma mincha vout', a mezza stà,  
 cur chi 's trattaiv' il pra da sgiar,  
 ils setters lur cuschina qua  
 in bel e trid solaivan far.  
 S' chattand lapro da nus qualchün,  
 schi 's regordaiva da quel di,  
 e 's passantaiva suot il pin  
 zuond bell' uretta sül mezdi. —  
 — Ed hoz, cha stais e lung il vzet,  
 stuet subit a quel pensar,  
 chi là 'l prüm fö quel di vüdet  
 ed uoss' eir it ais a posar.

16. 8. 20

#### 54. Fossas fraidas.

La foss' ais trida, s-chüra,  
 sgrischusa nel terrain;  
 immez glatschera püra  
 s' reposa bger pü bain.

La terra, chi cuverna  
 ils morts, ais ascra zuond;  
 cusü in naiv eterna  
 els dorman sön profuond.

In ün vaschè dad ambra  
 staun els in fraid vadret;  
 auror' in quaista chambra  
 splendura tres il tet.

Ils razs dal tschêl nu s-chodan  
 tres l' alv zindel dal munt;  
 da l' aivl' il clam nun odan  
 ils quatter suot sieu frunt.

Be cur l' orcan rebomba,  
 intuorn ils pizs buffand,  
 saettas fin lur tomba  
 penetran minchatant.

Giò 'l bass ils verms redüan  
 in puolvr' il corp uman;  
 nel glatsch nun il desdrüan  
 ne l' ümid, ne l' orcan.

Fors' in etern els restan  
 intacts e conservos;  
 perche lo neir molestan  
 microbs lur quaid repos.

Il Segner as perchüra,  
 vus victimas dal Palü!  
 Als voss la sort füt düra;  
 ma vus stais bain cusü.

21. 9. 13.

---

## 55. Funerel alpin.

Sül spih dasper il Scherschan  
 in trista missiun  
 ils razs dal tschêl sclareschan  
 manera e zappun.

Trais homens cò lavuran  
 in ota clarited;  
 els chevan üna fossa  
 nel glatsch, nu flippa pled.

Dal fraid bivac surrian  
 duos chers cumpagns barmörs,  
 chi 'n lur immensa brama  
 sül spih la vit'haun pers.

Surprais da grand'burrasca  
 süll'aspra sommited,

dandet ho cuolp d'saetta  
ad els piglio il fled.

Ed uoss' dasper l' ün l'oter,  
luvos in fraid vaschè,  
reposan els per saimper  
in majestus, ot lö.

Bernina fo la guardgia  
vers ost cun ögl larmant;  
vers occaint adoza  
Roseg sieu cho, vagliand.

Quadreis da glatsch cuvernан  
lur membra fraida lo;  
amihs la tomba serran,  
cha d' haun per els pino.

Ed üna crusch bain simpla  
indicha a l'alpin  
turist, ch'a mort subita  
dals lur mnet cò'l destin.

Da mütta sepultüra  
ils traïs pigliand cumgio,  
als relaschos els portan  
l'ultim salüd da cò.

Il vent be uossa chaunta  
cusü sa grand'chanzun;  
dal süd no ferm rebomba  
dal Piave il chanun.

Ma els sun in sgürezza.  
Sül majestus uter  
la fossa pü imposaunta  
haun els dal muond inter.

### 56. Nicola Mathieu

† 22. 7. 1913.

Magister füttast, conscienzchus,  
fidel a tia bella vocazion.  
Tscherchand da render vast teis orizont,  
adüna hast dovrà il rich teis dun.

Hast lavurà e, da success bramus,  
l' hast eir obtgnü, sper stim' ed affecziun  
da teis scolars e blers amis nel muond  
intim, chi tai plü bain ha cognuschü.

Als teis tü füttast figl zuond pisserus,  
marid e bap, chi cun immens' amur  
per els be massa cuort ha qui vivü.

Ta lingua chara hast tü cultivà  
e dals rumantschs cultura hast amà,  
chi hoz a tai s' impaissan in dolur.

### 57. A Giuanes Mathis

(† 7 Avuost 1912).

Dorma lam,  
veteran  
da ladina literatura!

Teis agir  
in avgnir  
per memorgia fat ha dmura  
aint ils cours  
d' frars e sours  
d' Engiadina suot e sura.

## 58. A Gudench Barblan

(† 5 October 1916).

Eu vez amo teis ögl riaint  
 in cumpagnia d' buns amis;  
 eu od adün' amo teis chant  
 e teis requints, allegers dits;  
 t' vez culla fotsch ir sül givè  
 e cul schluppet in god e munt,  
 giodair delizch' in simpel gö,  
 per libertà e dret far frunt.

— E tü nun est plü tanter nus,  
 hast accompli teis greiv destin,  
 t' hast massa bod rendü al pos,  
 deposit la penna e'l temprin.

Ma ti' amur per nos ladin,  
 'la viv' amo in teis prodots,  
 chi d' nossa tschantscha da cuntin  
 daran perdütta, sco fan hoz.

## 59. A Flurin Grand

(† 23 December 1926).

Nos char rumantsch-ladin hast cultivà,  
 savü dovrar sco pacs contemporans,  
 hast perscruttà da grandas naziuns  
 literatura cun stupend success.

T' hast miss a l' ouvr' in avanzad' età;  
 hast inrichi il pled dals pardavants  
 cun bels requints, cun rimas e chanzuns.  
 In fuorma s-chetta t' hast adün' express.

Dad esters, grands scriptuors tü hast culà  
 prodots da vaglia in bun vers ladin;  
 eroes grischuns e tips engiadinais

teis dramas han al public preschantà. —  
Recognuschaints ils noss saran cuntin  
a tai, capabel figl da lur pajais.

### 60. A rav. Otto Gaudenz

† 11 Avuost 1927.

Bler massa bod hast bandunà  
amis, ils teis e tia val,  
tuot que, cha tü hast operà  
aprô da teis linguach natal:

Hast viss il privel imminent,  
ed a defaisa convochà  
teis pövel hast cun clam fervent  
per seis idiom ferm imnatschà.

Dals Grischs s-chaffi hast l' Uniun;  
tras instancabl' assiduità  
hast implantà in els l' amur

e 'l sentimaint per protecziun  
da que ch' els han dals vegls ertà,  
mussand l' immensa sia valur.

Teis nom s' ha miss ün monumaint,  
chi survivrà il temp preschaint,  
aint in noss cours: Ingrazchamaint.

